

pechie & le recognoit. Et pource ie macorde a paix / mais il est bon que nous la  
faciōs de la voulēte & du cōsentemēt de noz amis. Lors prudēce fit vne chiere  
lie & ioyāt & dist. Certes dist elle vous aues trop biē respōdu / car tout ainsi cō  
me p le cōseil & laide de voz amis vous aues eu en propos de vous vēgier & de  
faire guerre aussi sans demāder leur cōseil vous ne deues acorder ne faire paix  
Car la loy dit que nulle chose nest tāt selon nature cōme la chose deslier par ce  
dont elle a este lye. Et incōtināt dame prudence enuoya messagiers & manda  
querre leurs parēs & leurs anciēs amis loyaux & sages & leur racōta le fait en  
la presence de melibee tout par ordre en la guise quil est deuise p dessus & lors  
demāda quel cōseil ilz dōroiet sur ce. Lors les amis melibee toutes les choses  
dessusdictes delibereez & examineez a grāt diligēce donnerent cōseil de paix et  
q lon les receipt a misericorde.

**Q**uāt dame prudēce eut ouy le cōsentemēt de son seigneur & le cōseil  
de ses amis si fut moult lye. Lon dit dist elle es prouerbes. Le bien q  
peult faire ta main natēde pas a lendemain. & pource ie cōseille que  
lon enuoye tantost messagiers sages & aduises a ses ennemis leur dire q se ilz  
veulent traicter de paix si cōme ilz se sont presentez que ilz se traiēt vers nous  
Et incōtinēt sans dilacion māderēt les ennemis de melibee & fut fait ainsi cō  
dame prudēce le conseilla. Quāt ces troys malfaicteurs & repentās de leurs fo  
lies ouyrēt les mesagiers si furēt lyes & ioyeux & respōdirēt en rendant grace  
a mō seigneur melibee & a toute sa cōpaignie quilz estoiet prestz & appareilles  
daler vers eulx sans dilaciō & obeir en tout et par tout a leur cōmandement  
Et assez tost apres ilz se mirent vers la court de melibee avec aucuns de leurs  
loyaulx amis. Quāt melibee les eut en sa presence il est verite dist il que vous  
sans cause et sans rayson auez fait grant iniure a moy et a ma dame prudence  
& a ma fille en entrāt en ma maison a violēce en faisant tel oultrage cōme cha  
cun scet p laquelle vous aues mort deseruie. & pource ie vueil que vous vous  
mettez du tout a ma voulente et a la voulēte de ma dame. Lors le pl<sup>9</sup> ainsnez  
& le plus sages de ces troys respondit pour tous. Sire dist il no<sup>9</sup> ne sommes  
pas dignes de venir a la court dūng tel seigneur car nous auōs tāt meffait que  
vrayemēt nous sōmes dignes de mort nō pas de vie / toutesuoyes nous auōs  
fiāce en vostre doucceur & debōnāirete dōt vo<sup>9</sup> estes renōmez p tout le mōde  
& pource nous nous offrōs & sōmes appareillez obeir a vous. & vous priōns  
a genoulx que vous ayes de nous pitie. Lors melibee benignement les crut